

Prins y Pancho Infantil a ricibi yabi di Minister Alex Schwengle



ORANJESTAD (AAN): Dia-domingo merdia Minister Dr. Alex Schwengle a ricibi e decreto di Prins SAC y Pancho SMAC na Bestuurskantoor den presencia di Reina Infantil di Carnaval Jaideleen "Jaidee" Tromp. Prins y Pancho hubenil y grandi tambe tabata presente y durante e siman aki nan lo entrega nan respectivo decreto.

"Nos sa cu nos no ta grandi pero mester pone atencion pasobra nos a bin serio pa e Gobierno aki, duna nos tur rason. Nos ta grupo di dos cu ta representa tur nos muchanan y nos sa cu ta nos chikitanan tin e consehonan cu tur Minister mester. Pesey mes cu awe diadomingo 1 de February 2015, ami Prins SAC miho conoci como Janirh Jayden Geerman, director ehecutivo di Prinses Amalia basisschool, e consehero di tur criaturanan di klas 2A, Emperador di Seroe Pita, professor di humor y inteligencia hunto cu mi Pancho SMAC, Zyqelo Emilson Ezeckias Guerero...cu ta cla pa kraak tur loke no ta na mi smaak. Dus guynan hala pa mi pasa, paso aki ta cos serio tin. Mi ta controlador di tur trafico cu ta pasa rond di Pavia y vecindario, Genio magnifico di st Dominicus College y consehero di henter edificio di COCOLISHI...cu tur Ministernan inclui", asina e decreto presenta na Minister Dr. Alex Schwengle ta inicia bisando.

E Prins y Pancho infantil a bisa cu nan no kier pone ningun presion riba Gobierno

pero si ta desea di pone bon cla cu nan tambe ta conta. Nan tambe por duna conseho y ordo na loke nan ta mira cu ta pasando eyfo. Ta pesey nan a inclui den nan decreto, cu:

(*) Durante temporada di carnaval for di awe en adelante Minister di Enseñansa lo entrega tur school opdracht pa organiza durante 5 siman carnaval tur dia den nos schoolnan. (*) Schoolnan lo habri for di 9'or di mainta pa 3'or di merdia incluyendo pago di lunch door di Minister di Enseñansa.

(*) Lesnan lo mester consisti di entre otro musica y su historia di carnaval. (*) Lesnan di diseño y decoracion di kostuum (pa esunnan kleurenblind). (*) Lesnan di baile y ritmo (pa esunnan cu ta stijf of ta perde compas). (*) Lesnan di articulacion y canto (pa e poberman cu kier sa cu sa canta of anima anto ta solamente grita mahos).

(*) Tur dialuna lo ta mita dia liber despues di actividadnan di carnaval. (*) Tur reina y prins cu pancho infantil ta haya anulacion pa school pa asina tuma nan tempo pa drecha body y vestuario pa presentacionnan na TV- Radio of corant. Artista nos ta toch??

(*) Organizacion SMAC cumpli cu loke nan a priminti pasobra e Prins y Pancho kier biaha y conoce mundo y ya cu nan ta menor di edad pasashi pa Mami y Papi tambe. (*) Minister di Hubentud corda cu nan tambe ta bira hoben den algun aña y cu



mester aplica reglanan anterior pa hobennan tambe aki 5 aña. (laga nos crece prome).

(*) Minister di Asuntonan Social pone hopi atencion riba mayornan cu ta bandona nan yiunan pa nan gosa di carnaval haya castigo. Especialmente esunnan cu ta yega cas burachi. (*) Minister di Salud pone Dokternan na altura cu durante carnaval tur firmamento di carta di dokter pa afwezig pa school, lo worde firma solamente pa Prins SAC y Pancho SMAC.

(*) Polisnan proteha nos muchanan durante parada y ranca horea di esunnan cu no ta tende, pa henter Aruba tende di Polisnan y duna nan un boter di awa durante parada.

Conclusion: Mirando cu ta pa prome biaha ta duna Prins y Pancho Infantil e oportunidad pa entrega un decreto na Gobierno, ta nos deseo pa esaki sigui pa tur e otro prins y pancho nan infantil cu ta bin. Duna nan e honor di desaroya como personahenan cu ta alegra tur hende. "Como mucha laga nos sinti nos responsabilidad pa guia paradanan di mucha", asina e Prins y Pancho a decreta.

Na final nan a gradici Minister pa su atencion presta y a pidi pa por favor nan ricibi un contesta back dentro di 5 min cu e decreto aki worde presenta. "Nos sa cu Minister ta poderoso y por tuma decision Minister su so", nan a bisa.

"Mi a scucha, analisa y mi ta declara di a acepta e decreto aki y asina nos por cuminsa celebra Carnaval Infantil manera debe ser, Pabien na tur e participantenan" Minister Alex Schwengle a contesta.

Minister Schwengle a entrega Prins y Pancho nan



yabi y sabel pa asina nan dirigi oficialmente paradanan di mucha.

Tambe Minister Alex Schwengle a haci un suplica na e mayornan pa por favor bebe cu moderacion y ta e ehempel pa e hobennan. Laga nan come bon y bebe hopi awa. Un conseho cu e mandatario a duna e Prins cu Pancho ta pa brasa nan mandato y yuda consentisa tur hoben pa practica deporte y come

sano.

"Hopi di e puntanan ta puntanan cu nos ta traha riba dje como Gobierno y mi ta convenci cu lo por tin un lus positivo riba e peticionan haci. Na e comunidad ban trata na celebra e Carnaval di un manera sano y corda cu responsabilidad ta cuminsa cerca nos cu ta e grand... asina Minister Dr. Alex Schwengle a conclui bisando.